

Powšitkowne WOZJEWJENJA

njedźelu Swjateje Trojicy, 4. junija 2023

Wusyłanje Božej mše

Serbskorěčnu Božu mšu móža wěriwi tutu njedźelu, Swjateje Trojicy, 4. junija, w 9.00 hodź. z Chrósćic jako livestream sčěhować. Link na nju je w interneće pod www.posol.de a na wosadnej stronje podaty.

Na Bože ćělo w Róžeńće

Na swjedženju Božeho ćěla, štwórtk, 8. junija, budu w Róžeńće kemše w 19 hodź. Na nje su wšitcy přeprošeni, kotřiž so wodnjo wobdźělić njemóža.

Nowa wustajeńca w klóštrje

Towarstwo Cyrila a Metoda z.t. je składnostnje lětušeje 775lětnjeje róčnicy załoženja klóštra Marijineje hwězdy wustajeńcu wo serbskich wjerškach w zwisku z jubilejom před 25 lětami zestajało. Přistupna je wona hač do njedźele, 1. oktobra, wot póndźele do pjatka wot 10.00 do 16.30 hodź, sobotu wot 12.30 do 16.00 hodź. a njedźelu wot 10.00 do 16.00 hodź. w rumnosći w přechodže z klóšterskeho dwora w Pančicach-Kukowje. We wustajeńcy su mjez druhim wobrazy wo procesionje na swjateho Marka z lěta 1998, wo dźiwadłowym předstajenju „Hvězda jasná“, swjedženskim čahu k tehdyšemu jubileju klóštra a scyła k jeho stawiznam wozjewjene. Přeprošeni su wšitcy, kotřiž su to tehdy dožiwili, runje tak kaž ci, kotřiž chcedža swoju předchadźacu generaciju 25 lět młódšu widzieć.

Putniska madona tež we Łužicy

K modlenju a na Bože mše před kopiju postawy sławneje Fatimskeje putniskeje mado-ny su wěriwi w Drježdžansko-Mišnjanskim, Zhorjelskim a Litoměřickim biskopstwje přeprošeni. Mjez druhim wustaja postawu tutu njedźelu, 4. junija, w putniskej cyrkwi w Róžeńće, hdžež budže w 10.30 hodź. Boža mša a w 14.00 hodź. nyšpor; póndźelu, 5. junija, na Božej mši w 19.00 hodź. w cyrkwi Marije donjebjeswzača w Kulowje kaž tež njedźelu, 11. junija, w klóšterskej cyrkwi klarisow w Budyšinje. Tam swjeća w 9.30 hodź. nyšpor a w 10.15 hodź. Božu mšu w pólskej rěči. Nadrobniši přehlad ze wšěmi městnami a Božimi službami je pod www.posol.de wozjewjeny.

Dalekublanje na polu prewencije před seksualizowanej namocu

Prewencija přećiwo seksualizowanej namocy je wažny wobstatk dźěla z dźěćimi a młodžinu we wosadach. Jeje zaměr je, nowu kulturu wzajomneje zhromadnosće wuwijać. Za to su prewentiwne struktury a procesy trěbne. K tej temje poskića we Worklečanskim Don Boskowym domje dalekublanja, a to na třoch terminach: sobotu, 10. junija, wot 13.00 do 16.00 hodź. kaž tež póndźelu, 19. a 26. junija, stajnje wot 18.00 do 21.00 hodź. Z nich móža sej zajimcy jedyn termin wuzwolić. Wšitcy pomocnicy na nabožnych prózdninskich dnjach we wosadach, ale tež dalši čestnohamtscy, kotřiž maja z dźěćimi a młodostnymi we wosadach zwisk, na přikład w sakristiji abo ze šolu, su cyle wutrobnje přeprošeni. Přizjewjenja přijimuju hač do póndźele, 5. junija, online. Link k tomu kaž tež k dalším wažnym informacijam je pod www.posol.de wozjewjeny.

Sabina Lanzyna, referentka za pastoralku dźěći

Duchowna hudźba w Budyšinje

Na duchownu hudźbu z Drježdžanskim koncertnym chórom Let's Sing! su wšitcy zajimcy tutu njedźelu, 4. junija, do Budyskeje tachantskeje cyrkwy prošení. Pod nawodom Nica Müllera zaklinči gospelowa, popowa a filmowa hudźba. Započatk je we 18.00 hodź. Zastup je darmotny. Po tym budže kolekta.

Serbski katolski miljej – diskusijny wječork w Budyskim Serbskim muzeju

„Ta naša serbska katolska Łužica. Zdžerža ludžo tole hač do kónca?“, praša so Marta Markowa ze Sernjan w dokumentaciji „Čej’ da sy?“. Filmowc Reiner Nagel je w nadawku Budyskeho Serbskeho muzeja a zhromadnje z nim 2021 interviewy natočil, z kotrychž nastaj krótki film. Dalši nazhoniči Serbja – ratar, rjemjeslnik, nošerka narodneje drasty, wučer a dekan – so słowa jimaja. Jim napřečo staji so wuhlad młodžiny z krótkofilmom „SMY“ Sofije Cyžec a Luizy Nawkec. Na wječornym zarjadowanju Serbskeho muzeja srjedu, 7. junija, je wot 19 hodź. składnosć, zhromadnje za wotmołwami pytać. Po wujimkach z filmow, kotraž pokazuja tež we wosebitej wustajeńcy – tam budže hižo we 18 hodź. wodženje –, slěduje powerpointowy přednošk „Serbski katolski miljej – kak dale?“ dr. Měrcina Wałdy. Wón wěnuje so mjez druhim prašenju, što rozeznawa cyrkej za čas socializma z tej džensa. Na přednoškowy wječor z diskusiju z referentom a filmowcami su wšitcy wutrobnje přeprošeni.

Kolesowarska tura „Z kolesom po serbskej katolskej kónčinje“

Prěnja kolesowarska tura pod hesłom „Klósťerski kraj – serbski raj“, pod nawodom Tadeja Šimana powjedže sobotu 10. junija, na Wotrow do južneho dźěla klósťerskeje kónčin. Započatk něhdže 25 kilometrow dołheje tury je w 10 hodź. na parkowanišću w Hornim Wujězdze. Njeh sej kóždy něšto k jědźi a k piću sobu přinjese. Po móžnosći měli so zajimcy do toho přizjewić – pak w interneće na stronje www.sorbisches-museum.de pak telefonisce w Budyskim Serbskim muzeju pod čisłom (0 35 91) 2 70 87 00.

Bigband da beneficy koncert za poskitk Charity

Beneficy koncert na dobro poskitka Charity, při kotrymž móža starši dźěćacu drastu mjenjeć, budže sobotu, 17. junija, w 16.30 hodź. w Smochčanskim kubłanišću swjateho Bena. Jón wuhotuje Bigband Drježdžanskeho gymnazija swjateho Bena. Přizamknje so grilowska party.

Kemše z biskopom, předstajenje noweje knihi a wotewrjenje pućowskeje wustajeńcy

Klósťerski a swójbný swjedžen Budyskeho wokrjesa wotměje so njedźelu, 18. junija, w klósťrje Marijinej hwězdze w Pančicach-Kukowje. Drježdžansko-Mišnjanski biskop Heinrich Timmerevers swjeći w 10.30 hodź. swjedžensku Božu mšu. Wot 13.00 do 17.00 hodź. scěhuje pisany program z hudźbu, rejowanjom a spěwanjom. Budyske Ludowe nakładnistwo Domowina předstaji w 15.00 hodź. w tamnišim Bjarnatowym domje nowu knihu „Čej’ da sy? – Einblicke in die sorbische katholische Welt“ z redaktorom Tadejom Šimanom, a to w zwisku z wotewrjenjom pućowskeje wustajeńcy „PRISMA. Žiwjenje při Klósťerskej wodze“ Budyskeho Serbskeho muzeja. Policajski orchester Sakskeje budže w 16.00 hodź. koncertować. Hač do zakónčaceho ekumeniskeho nyspora w 17.30 hodź. změja tam nimo toho regionalne a přirodowe wiki kaž tež wšelake poskitki towarstwow za swójby. Klósťer Marijina hwězda wobsteji lětsa 775 lět.

Brigada spěwa w Marijinej hwězdze

Chór 1. serbskeje kulturneje brigady z.t. wuhotuje sobotu, 17. junija, we 18.00 hodź. koncert składnostnje 775. róčnicy založenja klóštra Marijineje hwězdy w tamnišej cyrkwi. Nawod změje cyrkwinskohudźbny direktor Friedemann Böhme, klawěrný přewod přewozmje Gina Hentsch. Mjez druhim zaklinča twórby Jana Pawła Nagla, Korle Awgusta Kocora, Antona Brucknera a Měrcina Weclicha. Zastup je darmotny. Zarjadowarjo proša wo kolektu za wuprawu chóra. Na njej wospjetuje wón koncert srjedu, 21. junija, w Ljubljanje.

Koncert chóra z bliskosće Lipska w Ralbicach

Na koncert chóra Neukieritzsch z.t. su wšitcy zajimcy sobotu, 24. junija, w 16.00 hodź. do Ralbičanskeje wosadneje cyrkwy prošení. Pod nawodom kantora Viktora Vettera zaklinča „Němska Boža mša“ komponista Franza Schuberta kaž tež gospelowe spěwy. Zastup je darmotny. Po tym budže zběrka na dobro wosady a spěwneho ćělesa. Neukieritzsch je gmejna wosrjedź Lipšćanskeje noweje jězoriny.

Ministrantska kopańca

Koparski turněr ministrantow ze serbskich wosadow budže sobotu, 24. junija, w Pěskecach. Započatk je w 9.00 hodź. z Božej mšu we wjesnej kapałce.

Přednošk wo podrywaniu demokratije

„Kedźbu pasle! Kak prawicarscy ekstremisća a reichsbürgerowo demokratiju podrywaja“ rěka hesło zarjadowanja, kotrež wotměje so srjedu, 14. junija, wot 19.00 do 21.00 hodź. w Jakubetzowym wustawje w Kulowje. Referentaj wječora budžetaj dr. Harald Lamprecht, społnomócnjeny za prašenja swětonahlada Ewangelsko-lutherskeje krajneje cyrkej Sakskeje, a Christian Schäfer, träger von BUNT – Syć za demokratiju a wšelakorosć w Budyskim wokresu. Link k nadrobnišim informacijam je pod www.posol.de podaty.

Putniska jězba

Na serbsku putnisku jězbu wot wutory do pjatka, 18. do 21. julija, přepróšuje Radworske Šmitec busowe wozydłownistwo. Wobdžělnicy wopytaja klóšter Huysburg, Naumburski dom kaž tež měšće Halle a Hildesheim. Přizjewjenja přijimuje Šmitec wozydłownistwo, telefonowe čisło (03 59 35) 28 60.

Putnikowanje dekanatneje młodžiny

Lětuše putnikowanje serbskeje dekanatneje młodžiny do Róžanta budže tutu njedźelu, Swjateje Trojicy, 4. junija. Młodostni njech so dojednaja, hač chcedža so jako wosadna młodžina sami do Róžanta podać abo hač přewozu poskitk zhromadneho putnikowanja z Worklec. Wšitcy, kiž chcedža wottam putnikować, zetkaja so w 9.00 hodź. w tamnišej kapałce. Wotchad procesiona je w 9.15 hodź. Boža mša w Róžeńće budže w 10.30 hodź. Po kemšach so młodostni w procesionje do Worklec nawróća. Ći, kotřiž su so za Swětowe zetkanje młodžiny w Lissabonje přizjewili, wostanu w Róžeńće. Za nich přizamknje so tam předzetkanje. Młodostni njech přinjesu sej swój młodžinski baner sobu.

Z kolesom putnikować

Na putnikowanje z kolesom přepróšuje Smochčanske kubłanišćo swjateho Bena wšitkich zajimcow wot njedźele, 24. septembra, do njedźele, 1. oktobra. Nawod změjetaj farar Thomas Cech ze Žitawy a Alojs Rječka z Łužnicy. Přizjewjenja přijimuja hač do pjatka, 1. septembra. Link k tomu a k dalšim informacijam je pod www.posol.de wozjewjeny.

Informacije k wuprawje do Waldsassena

Na kubłansku jězbu do Waldsassena wotjědže bus štwórtk, 15. junija, po scěhowacym planje:

6.00 hodź. Radwor (pola Šmitec)

6.30 hodź. Chrósćicy

6.45 hodź. Pančicy-Kukow

(parkowanišćo na kromje wsy do směra Zejicy)

Zdobom měli ci, kotřiž su přizjewjeni, zbytnje 235 eurow na konto TCM zapłaćić: Cyrill-Methodius-Verein e.V., IBAN DE65 7509 0300 0008 2823 66, hesło: „Waldsassen“.

Wotjězd busa wulěta samostejacych

Wulět samostejacych budže přichodnu wutoru, 6. junija. Bus pojedže po slědowacym planje:

5.55 hodź. Radwor (pola Šmitec)

6.10 hodź. Haslow

6.11 hodź. Baćoń

6.15 hodź. Nuknica

6.20 hodź. Chrósćicy (při farje)

6.25 hodź. Hórki

6.30 hodź. Hrańca (zwonka wsy)

6.35 hodź. Różant (pola Suchec firmy)

6.40 hodź. Worklecy

6.45 hodź. Serbske Pazlicy

6.50 hodź. Njebjelčicy

6.55 hodź. Pančicy-Kukow (apoteka)

7.00 hodź. Wotrow

7.05 hodź. Kašecy

6.15 hodź. Kulow (torhošćo)

6.25 hodź. Konjecy

6.30 hodź. Ralbicy

6.35 hodź. Łazk

6.40 hodź. Pěskecy

Hdžež njeje ničo připisane, je wotjězd wot busoweho zastanišća. Płaćizna jězby wučinja 69 eurow ze zastaranjom z jědžu. Njeh sej wšitcy Wosadnik sobu přinjesu.

Z busom do Krupki

Na putnisku Božu mšu srjedu, 16. awgusta, w 10.00 hodź. w Krupce pojedže zaso bus. Štóz chcył sobu jěć, měł so w Radworskim Šmitec wozydłownistwje přizjewić, telefonowe čisło (03 59 35) 28 60.